

榮縣志



榮縣志

增圖表共十七篇

卷十七篇


屠維大荒駱桼汜

榮縣全境圖

圖式

城治	鄉市	道保	河川	山脈	縣界	鎮界

榮縣全境總面積一萬一千四百四十六方里



榮縣志

沿革第一

昔黃帝畫野分州得百里之國萬區巴蜀爲九圉之一。後世以蜀爲邊遠不知諸夏種族皆自西來。高陽生於若水。高辛生於江水。二水皆蜀地。今卽江水徵之。史記本紀黃帝娶西陵之女嫫祖。生二子。其一立囂。是爲青陽。降居江水。大戴禮帝繫青陽降居氐水。按江水今岷江嘉定水也。氐水卽湔水。今沱江資中水也。凡立國必以山川表其方望。史稱江水其地實括江之東。乃與氐水合。禮稱氐水其地實括氐之西。乃與江水合。旣界江氐東西之中。是青陽降居地當榮縣審矣。清張澍箸蜀

典引榮縣青陽門記云。榮門有青陽洞。以少昊國在其北。少昊據國語韋昭注也。史記不以青陽爲少昊。云高辛乃立位焉。明榮縣令楊崇忠榮梨山碑云。古爲立囂崖。立囂卽青陽。碑與史合。故唐以來附榮之境。世有青陽族居。今裔猶餘。汲冢古文云。少皞名清。帥鳥師居西方。清卽青陽。西方卽蜀矣。唐司馬貞注史記云。皆在蜀。卽所封國。而舍榮縣外。古蜀郡及犍爲郡。凡江水泝水所經。無以青陽傳者。是榮爲古青陽封國審矣。青陽洞。今在城南二里。青陽之孫高辛也。榮爲高辛氏所生之鄉。帝堯所自出。有史記大戴禮可徵。信義宜特箸。

堯時洪水爲害禹貢治江於蜀之山川瞭如在目。候人
一歌肇始南音。風雅所本。伯益紀山海於蜀之山川草
木鳥獸雖怪奇備舉。書曰岷山導江。江者今嘉定之水
也。東別爲沱。沱者今資中之水也。江沱之間尤禹迹所
熟經者矣。

晚殷被文王之化地尤文明。鄭康成曰西伯周文王也
時國於岐封爲雍州伯南兼梁荆。梁卽蜀矣。召南江沱
之詩聖師所定實卽蜀人之作。欲知當蜀何地先卽沱
水定之。按鄭氏說沱意主鄠江。云首出江南至犍爲武
陽入江。郭景純諸人則以郫江爲沱。大氏尋之成灌百

里內外。然水經注指當時所謂沱江。乃開明之所鑿。華陽國志傳郫江自李冰穿之。則凡諸儒所推郫江。檢江不獨遠違禹績。亦非文王之所豫知。清通人胡渭齊召南孫星衍。決以灌縣西南分江。至瀘州復合者。爲沱。繇是昭晰無疑。水道可披圖而定。再繹詩言。江汜江沱。固主水言。江渚則明指中洲矣。古今郡縣改易。而治地大氏相沿。今之眉嘉敘一帶縣治。皆濱江也。於沱無涉。今之簡資內富。皆濱沱也。於江無涉。其居江沱中者。惟仁與榮。而仁壽在漢猶屬武陽東境。則中渚惟榮當之矣。且水經注以今嘉定爲開明故治。是文王時嘉定未開。

建也。常志以杜宇治郫。或治瞿上。開明白夢郭移。乃徙成都。是文王時成都未開建也。江沱之間。除棘人所居。風教可思者。惟榮久爲青陽封國。常璩稱德在少昊。又稱被文王之化。秦豳同詠。故有夏聲於榮也。準之時地而皆近。宜好學深思者通其意焉。

武王伐紂。蜀能助順。周時王會列千八百國之中。入貢文翰。證今方物。文翬赤羽。榮產猶鯀。蓋周公斤而大之。以鄭立言。蜀確在版圖之中也。常志周失綱紀。蜀先稱王。自望帝禪位開明。水經注漢南安即開明故治。南安即今嘉定也。去榮裁二百里。漢爲一大縣。是榮爲當日

王畿矣。周慎王五年秋，秦滅蜀，置郡。赧王元年，以張若爲蜀守。榮於是爲南安。

南安旣確定爲今之嘉定。呂治青衣江會故，而知爲秦縣者。華陽國志：孝文王以李冰爲蜀守，沫水合南安。冰乃鑿湫崖，平鹽漑，是冰時已有南安。一也。南安者，兵後名。誼言南中安定耳。漢初，蜀無兵警，知南安爲秦縣。二也。周制：上大夫受縣，下大夫受郡。秦則以郡監縣，有蜀郡，必置南安縣。三也。史記司馬相如傳：邛笮冉駹，秦時嘗通爲郡縣。至漢興而罷，豈南安在腹地而不置縣之理。四也。史記高祖功臣表：六年三月，庚子，封莊宣虎爲

南安侯。漢書同。揆高祖初年之封。知南安秦時之縣。五也。漢志秦三十六郡。漢興以其太大。稍復開置。南安在漢初幅員已廓。苟秦無此縣。則蜀郡荒而無紀。六也。南安既定。榮系自明。今自漢次第如左方。

漢初南安爲侯國

史記莊宣虎封南安侯。太平寰宇記宣虎之封在今夾江縣。蓋指其駐所。若其治青衣江會。則自開明時已定矣。

時南安在蜀郡爲至廣。榮全境在南安腹地。

史記鄧通傳蜀郡南安人。知漢初南安猶屬蜀郡也。

左思蜀都賦注。南安五岨山。在越嶲界。水經引常志。沫青衣二水。於漢嘉青衣縣東入江。是南安西北接越嶲雅安矣。呂后治犍道縣。是南安前括宜賓矣。太初城武陽。是南安前括彭山矣。武帝置犍爲郡。始有江陽。是南安前括瀘州矣。今之榮境。故在漢南安腹地。

武帝置犍爲郡。南安始屬犍爲。東漢因之。

武帝建元六年。置犍爲郡。前志縣十二。犍道。江陽。武陽。南安。資中。符牛鞞。南廣。漢陽。郁郅。朱提。堂琅。新莽。改犍爲曰西順。後志九城。武陽。資中。牛鞞。南安。犍道。

江陽荷節南廣漢安前漢犍爲治犍邑今遵義地應
劭曰故夜郎國語猶不誤元光五年移南廣今南溪
後因保定三年移治武陽今彭山而水經注犍爲武
陽曰故大夜郎國斯誤矣杜佑樂史諸人因之徑指
今嘉定諸縣爲夜郎尤大誤矣史記唐蒙見夜郎侯
多同約爲置吏夜郎旁小邑乃且聽蒙旣云旁小邑
則全郡非夜郎明矣蜀郡先於犍爲南安本屬蜀郡
是并非夜郎旁小邑常志所謂分巴割蜀以成犍廣
是也常志南安治青衣江會青衣與江會其地正今
嘉定若古之漢嘉今名山境前志蜀郡有青衣縣水

經注、青衣王子心慕漢制。求內附。順帝陽嘉二年。改曰漢嘉。嘉得此良臣也。縣有蒙山。青衣水所發。與今嘉定迴隔。旣立犍道江陽。則南安版圖減於漢初矣。蜀漢立江陽郡。榮之境減兩漢時。

常志。建安十八年。漢安程徵石謙白州牧劉璋求立江陽郡。璋聽之。晉地理志。蜀章武元年。分犍立江陽郡。治江。雒會。唐李吉甫元和郡縣志。宋樂史太平寰宇記。榮州下。皆云漢南安地。公井下。云江陽地。知江陽旣由縣改郡。今榮東境胥屬江陽矣。

晉因之

晉志犍爲郡統縣武陽、南安、犍道、資中、牛鞞。建元間，李勢據蜀，獠出犍爲梓潼，布滿山谷。蜀之有獠自此始。榮則鐵山獠正據北地。

後置治官

晉自李勢滅後，至孝武寧康元年，苻堅將楊安陷蜀，西南夷邛笮夜郎等皆歸之。安爲益州牧，鎮成都，巴獠叛之，不勝。後二十年，晉復取益州，而犍爲郡縣無改。至安帝義熙十年，乃分立治官，在今榮之西境。自是榮爲治官地，與南安無涉。

宋爲治官地

宋書州郡志。犍爲郡領縣武陽。南安。資中。犍道。冶官。
齊如晉制。

南齊書州郡志。益州犍爲郡領犍道。南安。資中。冶官。
武陽五縣。按劉峻傳。永明八年。啟世祖云。鄧通。南安
人。漢文帝賜嚴道縣銅山鑄錢。今蒙山近青衣水。竝
是故秦之嚴道地。青衣縣又改名漢嘉。去南安二百
里。必是通所鑄。據此齊治南安。仍漢晉故地。在今嘉
定。省志通指爲夾江。是悖常志。榮爲冶官如故也。

永元三年。榮僞置南安郡。

齊志。益州南安郡領縣五。南安。華陽。白水。樂安。桓道。